



Na osnovu člana 2.9 stav (1) tačka (9), a u vezi člana 11.1 stav (2) i člana 11.6 stav (2) i (3) Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14 i 31/16), Centralna izborna komisija Bosne i Hercegovine u postupku utvrđivanja rezultata izbora i dodjele mandata za Narodnu skupštinu Republike Srpske je na 80. sjednici, održanoj 05.11.2018. godine, donijela

ODLUKU

o izmjeni stava (1) alineja 1 odluke o II izmjeni Odluke broj: 05-1-07-1-1274-1/18 od 22.10.2018. godine o utvrđivanju i objavljivanju rezultata Općih izbora u Bosni i Hercegovini 2018. godine

(1) U odluci o II izmjeni Odluke broj: 05-1-07-1-1274-1/18 od 22.10.2018. godine o utvrđivanju i objavljivanju rezultata Općih izbora u Bosni i Hercegovini 2018. godine u stavu (1) alineja 1 se mijenja i glasi:

„- za političkog subjekta 02372-Srpska demokratska stranka-(SDS-SRSRS-SRS), 3. mandat na kompenzacijskoj listi na kojem se nalazi kandidat Mihajilica Milanko (Srbin) dodjeljuje se kandidatu političkog subjekta 00515-Savez nezavisnih socijaldemokrata-SNSD na 10. mjestu kompenzacijske liste, Šulić Denisu“.

(2) Ova odluka stupa na snagu danom donošenja i objavit će se 06.10.2018. godine na internet stranici Centralne izborne komisije Bosne i Hercegovine www.izbori.ba, i smatrat će se da je danom objavljivanja ista dostavljena strankama-učesnicima iz stava (1) ove odluke.

O b r a z l o ž e n j e

Centralna izborna komisija BiH je donijela Odluku o II izmjeni Odluke o utvrđivanju i objavi rezultata Općih izbora u Bosni i Hercegovini 2018. godine kojom se za nivo 300 Narodna skupština Republike Srpske:

- za političkog subjekta 02372-Srpska demokratska stranka-(SDS-SRSRS-SRS), 3. mandat na kompenzacijskoj listi na kojem se nalazi kandidat Mihajilica Milanko (Srbin) dodjeljuje se kandidatu istog političkog subjekta na 4. mjestu iste kompenzacijske liste, Bukejlović Nini, i

-za političkog subjekta 00515-Savez nezavisnih socijaldemokrata-SNSD, 4. mandat na kompenzacijskoj listi na kojem se nalazi kandidat Vuković Radovan, dodjeljuje se kandidatu istog političkog subjekta na 49. mjestu iste kandidacijske liste, Kovačević Sanji.

Nakon podnesene žalbe na navedenu odluku, Apelacioni odjel suda Bosne i Hercegovine je Rješenjem broj: S1 3Iž 030949 18 Iž od 02.11.2018. godine uvažio žalbu Srpske demokratske stranke (SDS-SRSRS-SRS), odluku Centralne izborne komisije BiH ukinuo u stavu (1) alineja 1 u dijelu kojim se za političkog subjekta 02372-Srpska demokratska stranka-(SDS-SRSRS-SRS), 3. mandat na kompenzacijskoj listi na kojem se nalazi kandidat Mihajilica Milanko (Srbin) dodjeljuje kandidatu istog političkog subjekta na 4. mjestu iste kompenzacijske liste, Bukejlović Nini, i predmet vratio Centralnoj izbornoj komisiji BiH na ponovno odlučivanje.

Iz naprijed navedenog proizilazi i činjenica da je u preostalom dijelu odluka broj: 05-1-07-1-1274-22/18 od 29.10.2018. godine o II izmjeni Odluke broj: 05-1-07-1-1274-1/18 od 22.10.2018. godine o utvrđivanju i objavljivanju rezultata Općih izbora u Bosni i Hercegovini 2018. godine potvrđena, konačna i obavezujuća.

Centralna izborna komisija BiH postupajući po primjedbama Apelacionog odjela suda BiH u navedenom rješenju, donijela odluku kao u dispozitivu.

Odredbama člana 11.1 stav (2) Izbornog zakona BiH propisano je da najmanje četiri člana svakog konstitutivnog naroda bit će zastupljeno u Narodnoj skupštini Republike Srpske.

Članom 11.6 stav (2) Izbornog zakona BiH je propisano da ukoliko svaki od konstitutivnih naroda ne osvoji minimalni broj od četiri mandata, naknadni kompenzacijski mandati se dodjeljuju kandidatu relevantnog naroda sa kompenzacijske liste političke stranke ili koalicije koja je osvojila najveći broj glasova i koja na listi ima još kvalificiranih kandidata iz relevantnog naroda, a stavom (3) pored ostalog, da ukoliko politička stranka ili koalicija na svojoj kompenzacijskoj listi nema dovoljno kvalificiranih kandidata iz reda relevantnog konstitutivnog naroda da popuni mjesta koja su joj dodijeljena, tada se mandat prenosi na listu stranke ili koalicije koja je osvojila najveći broj glasova i koja ima još takvih kandidata na svojoj kompenzacijskoj listi.

Centralna izborna komisija BiH je, prilikom donošenja Odluke o utvrđivanju i objavi rezultata Općih izbora 2018. godine broj 05-1-07-1-1274-1/18 dana 22.10.2018. godine, te uvidom u ovjerene kandidatske liste i ovjerene Izjave (OKL-1VIJ- član 4.19. Izbornog zakona BiH) izabranih zvaničnika za nivo 300 -Narodna skupština Republike Srpske, utvrdila da od ukupnog broja koji se bira, 83 poslanika Narodne skupštine Republike Srpske, nije izabran minimum od najmanje 4 poslanika iz svakog konstitutivnog naroda, kako je to propisano članom 11.6 stav (2) Izbornog zakona BiH, a u vezi sa članom 11.1 istog zakona, odnosno da nedostaje jedan poslanik iz reda bošnjačkog naroda.

Istom Odlukom je utvrđeno da će primjena ovog člana zakona biti implementirana naknadno, a prije potvrđivanja izbornih rezultata, iz razloga što je slijedio period i proces ponovnog brojanja glasova po zahtjevima političkih subjekata ili po službenoj dužnosti, prilikom čega bi moglo doći do promjena rezultata i u pravcu da se ova anomalija ispravi (ili produbi), što bi tada bilo preuranjeno donošenje ove odluke. Kako je proces ponovnog prebrojavanja za ovaj nivo vlasti završen, a rezultati su ostali isti, to je trebalo pristupiti donošenju ove odluke. Prilikom donošenja ove Odluke, u skladu sa članom 11.1 Zakona, korištena je formula iz člana 9.5 i 9.6 Izbornog zakona BiH, uz paralelnu primjenu odredbi člana 11.6.

Tom prilikom je utvrđeno, da je 81. posljednji količnik na kojem se mogao dodijeliti mandat kandidatu bilo kojeg konstitutivnog naroda, a da već 82. se ne može dodijeliti kandidatu iz reda srpskog naroda, pošto je preostala dodjela jednog mandata, jer nedostaje jedan poslanik iz reda bošnjačkog naroda. Taj količnik i mandat pripada političkom subjektu 02372-Srpska demokratska stranka-(SDS-SRSRS-SRS), a kako se tom 3. mjestu nalazi ime kandidata Mihajilica Milanka, koji se izjasnio kao Srbin, isti mu nije mogao biti dodijeljen, i da pregledom svih listi za ovaj nivo vlasti je utvrđeno da ovaj politički subjekt nema kandidata koji se izjasnio kao Bošnjak, te prema tome je otpala i mogućnost da se traži dopunska komenzacijska lista u smislu člana 9.7 a Izbornog zakona BiH.

Na osnovu naprijed navedenog, a u skladu sa odredbom člana 11.6 stav (3) Izbornog zakona BiH, te činjenici da je politički subjekt 00515- Savez nezavisnih socijaldemokrata-SNSD, politički subjekt koji je osvoje najveći broj glasova, odnosno najveći količnik, gdje je slijedeći kandidat na 10. mjestu kompenzacijske liste ovog političkog subjekta Šulić Denis, koji se izjasnio kao Bošnjak, Centralna izborna komisija BiH je donijela odluku kao u dispozitivu.

Pravna pouka: Protiv ove odluke, u skladu sa članom 6.9 stav (1) i (2) Izbornog zakona Bosne i Hercegovine, može se podnijeti žalba Apelacionom odjelu Suda Bosne i Hercegovine u roku od dva dana od dana objave ove odluke.

Žalba se podnosi preko Centralne izborne komisije Bosne i Hercegovine i dostavlja se putem faks aparata na broj 033/251-329 ili lično u sjedište Centralne izborne komisije Bosne i Hercegovine, Ulica Danijela Ozme broj 7, Sarajevo.

Broj: 05-1-07-1-1274-59/18
Sarajevo, 05.11.2018. godine



Predsjednik

Branko Petrić